

**Aningaasarsianit akileraarutit pillugit Inatsisartut  
inatsisaata allanngortinneqarnera pillugu Inatsisartut  
inatsisaat  
(Kalaallit Nunaanni soraarnerussutisiaqalernissamut  
aningaasaateqarfinni  
soraarnerussutisiaqalernissamut ileqqaakkanit  
iluanaarutit akileraarusersorneqartarunnaarnissaat,  
aquuteralannut inuussutissarsiutigalugu  
umiatsiaararsorluni aalisarnermi atorneqartunut  
nalikilliliinermut malittarisassani allannguutit,  
takornariartitsilluni imaluunniit attartorluni  
imaatigut angalaneq, kiisalu nuussinernik  
nakkutigisanik uppernarsaanissamut il.il.  
piumasaqaatit aamma nunamit nunamut  
nalunaarusiornerit il.il.)**

**§ 1**

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaanni nr. 11, 15. november 2007-imeersumi, Inatsisartut inatsisaanni nr. 20, 18. november 2010-meersumi, Inatsisartut inatsisaanni nr. 9, 3. december 2012-imeersumi, Inatsisartut inatsisaanni nr. 37, 9. december 2015-imeersumi, Inatsisartut inatsisaanni nr. 29, 28. november 2016-imeersumi, Inatsisartut inatsisaanni nr. 18, 26. juni 2017-imeersumi kiisalu kingullermik Inatsisartut inatsisaanni nr. 48, 23. november 2017-imeersumi allanngortinneqartumi, tulliuuttut makku allannguutigineqarput:

1. § 3, *imm.* 3, ima oqaasertalerneqassaaq:

” *Imm.* 3. Ingerlatseqatigiiffinnik suliffeqarfinnillu, aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu aatsitassanik iluaqutiginninniarsinnaanermut,

erngup nukingata innaallagissiornermut atorneqarnera pillugu Inatsisartut inatsisaat naapertorlugu aamma niuernermit tunngaveqarluni sermimik imermillu iluaquteqarsinnaaneq pillugu Inatsisartut inatsisaat naapertorlugu akuersissuteqarfigineqarsimasunik akileraarusersuineq, pisinnaatitaaffeqalersup akuersissutaani aalajangersakkat malillugit atorunnaassaaq.”

**2. § 3-mi, imm. 4-tut ilanngunneqassaaq:**

” Imm. 4. Kapitali 4 a naapertorlugu soraarnerussutisiaqalernissaq siunertaralugu ileqqaakkat aamma soraarnerussutisiaqalernissamut aningaasaateqarfinni soraarnerussutisiaqalernissamut aaqqiissutini, § 1, imm. 1, nr. 9-mi taaneqartutut, iluanaarutinit akileraarusersorneqassanngillat §§ 86-87 naapertorlugu ingerlatseqatigiiffinit kattuffinnillu Kalaallit Nunaanni najugaqartunit tiguneqartut.

Akileraartussaataasut kapitali 4 a naapertorlugu soraarnerussutisiaqalernissaq siunertaralugu ileqqaagallit, aningaaserivimmik isumaqatigiissuteqarnikkut akileraartussaataasooq sinnerlugu iluanaarutinit akileraarutit unerartinneqartut utertinneqarnissaat pillugu § 90 naapertorlugu aningaaserivik qinnuteqartissinnaavaat.”

**3. § 23, imm. 2-mi, nr. 5-itut nutaatut ilanngunneqassaaq:**

”5) Aquuteralammik, angallatinut 8 meteri ataalluguluunniit (takissusia tamaat) takissusilinnut atugassamik pisinermi aningaasartuutit imaluunniit pisinermi akip 100 procentia tikillugu.

Aquuteralammut ataatsimut pisiarineqartumut aningaasartuutit ukiumi isertitaqarfusumi ataatsimi taamaallaat nalikilliliisoqarsinnaavoq. Aalajangersakkami imm. 1 atuutissappat makku tunngavigineqassapput:

a) angallat inuussutissarsiutigalugu aalisarnermut atorneqassaaq aammalu akileraartussaataasooq sinerissamut qanittumi inuussutissarsiorluni aalisarnissamut akuersissuteqassalluni, imaluunniit

b) angallat takornariartitsinermit attartortitsillunuunniit angallassinermut atatillugu ilaasunik angallassinissamut akuersissuteqassaaq aammalu ukiumi isertitaqarfusumi akileraartussaataasooq takornariartitsilluni attartortitsillunuunniit angallassinermi taamaattumit 50.000 kr.-t taakkuluunniit sinnerlugit isertitaqartutut ukiumoortumik nalunaarsuisimassaaq.”

**4. § 23, imm. 3-4 ima oqaasertalerneqassaaq:**

” Imm. 3. Namminersorluni inuussutissarsiornermik ingerlataqartut imm. 1-mi taaneqartut nalikillilerneqarsinnaasunut aningaasartuutinit aammalu pigisanut nalilinnut il. il. imm. 2, nr. 3-5-mi taaneqartunut kontomik ataatsimut naatsorsuiffiusussamik naatsorsuuteqassapput. Ukiumi nalikilliliissutit ukiup aningaasarsiorfusup naanerani nalikillilerneqarsinnaasup nalinga tunngavigalugu nalikilliliissutigineqartassapput. Naliusoq taanna ukiup aallartinnerani naliusup nakilliliissutaasinnaasutut aningaasartuutinit imaluunniit ingerlatsinermit atortut il. il. pissarsiarinerani nalinginik ilallugit naatsorsorneqartassapput, taakkua ukiumi aningaasarsiorfusumi pissarsiarineqarsimappata, aammalu ukiumi ingerlatsinermit atortut il. il. ukiumi aningaasarsiorfusumi tuninerini nalinginik kiisalu imm. 2, nr. 4-5 naapertorlugit nalikilliliissutaasunik ilanngaateqartillugit. Pitsanngorsaatinit aningaasartuutit pissarsinermit naliusutut suliarineqartassapput. Ukiup aallartinnerani naliusoq tassaavoq ingerlatsinermit atortut il. il. ukiumi siusinnerusuni pissarsiarinerisa nalingi aammalu aningaasartuutit nalikilliliissutinit ilanngareerlugit nalingat.

Imm. 4. imm. 2, nr. 3-5-mi pigisanik taaneqartunik tunisinikkut naliusut nalikilliliissutigineqarsinnaasup

sinnera qimmussimappassuk, nikingassut naatsorsugaq ukiumi aningaasarsiorfusumi tassani isertitatut ilanngunneqassaaq.”

5. § 34-mi nr. 20-tut ilanngunneqassaaq:

”20) Uummannap eqqaani ulloq 18. juni 2017-imi innuttaasunut eqqutaasunut Namminersorlutik Oqartussanit ataasiaannartumik tapiissutigineqartut.”

6. § 36 b, imm. 1 ima oqaasertalerneqassaaq:

” Akileraartussaataitaasut § 36 a-mi pineqartut namineerluni nalunaaruteqarnermi, § 36 a-mi taaneqartunik inunnik inatsisitigullu pisinnaatitaasunik aalajangersimasumillu ingerlatsiviusunik illuatungeqarluni niuernikkut imaluunniit aningaasatigut ingerlatitsinerit (nakkutigisaasunik iliuutsit) suuneri annertussusiilu pillugit paasissutissanik tunniussissapput.”

7. § 36 b, imm. 2, oqaaseqatigiinni siullerni ”nakkutigisaasunik iliuutsinut” kingorna ivertinneqassaaq: ”taamaattoq imm. 4 takuuk”.

8. § 36 b, imm. 2, oqaaseqatigiit sisamaattut, tallimaattut arfernattullu ivertinneqassaaq:

”Paasissutissanik toqqorsivinnit misissuinertut allakkatigut uppersaatait aatsaat suliarineqartassapput akileraaruseriffik tamatuminnga piumasaqarpat, sivikinnerpaamillu ullunik 60-inik piffissaliilluni. Iliuutsinut nakkutigisaasunut annertussutsikkut akulikissutsikkullu pingaaruteqanngitsunut allakkatigut uppersaasiortoqassanngilaq. Allakkatigut uppersaatait imarisassaasut pillugit Naalakkersuisut malittarisassiorsinnaapput.”

9. § 36 b, imm. 4-5 ivertinneqassapput:

” Imm. 4. Akileraartussaataitaasut, kisimiillutik imaluunniit § 36 a, imm. 4, naapertorlugu ingerlatseqatigiiffiit ingerlatseqatigiiffissuakkut imminnut atasut peqatigalugit, 250 ataallugit sulisoqartut aamma ukiumut katillugit 125 mio. kr.-nik naatsorsuutitigut oqimaqatigiissitaqartut imaluunniit ukiumut 250 mio. kr.-t ataallugit kaaviiaartitaqartut, imm. 2, oqaaseqatigiit pingajuat, sisamaat tallimaallu sulit atuutsillugit, taamaallaat allakkatigut uppersaatinik suliaqarlutillu toqqortaqaartassapput qanoq akigitat atugassarititaasullu aalajangersarneqarneri pillugit:

1) Inunnut pappiaqqatigullu inunnut nunani allaneersunut iliuutsinut nakkutigisaasunik nuussinertut, takuuk § 36 a, imm. 6, Kalaallillu Nunaata naalagaaffillu allap pineqartup akornanni marloqiusamik akileraartannginnissamut isumaqatigiissuteqarfunngitsunut.

2) Iliuutsinut nakkutigisaasunut nunani allani aalajangersimasumik ingerlatsiveqartuni, takuuk § 36 a, imm. 6, Kalaallillu Nunaata naalagaaffillu allap pineqartup akornanni marloqiusamik akileraartannginnissamut isumaqatigiissuteqarfunngitsunut.

3) Iliuutsinut nakkutigisaasunut Kalaallit Nunaanni aalajangersimasumik ingerlatsiveqartuni, tassani akileraartussaataitaasoq, § 36 a, imm. 1, nr. 5 naapertorlugu naalagaaffimmi aallami Kalaallit Nunaannik marloqiusamik akileraartannginnissamik isumaqatigiissuteqanngitsumi angerlarsimaffeqarnera toqqammavissaatillugu.

*Imm. 5.* Imm. 4-mi annertussutsinut killiliussani pappiaqqatigut inuit akileraartussaataasumut ingerlatseqatigiiffissuakkut imminnut atasunut, takuuk § 36 a, imm. 4. Ataatsimut oqimaatqatigiissitsinermik naatsorsuineri taamaattoq akiitsut akiligassallu akileraartussaataasup pappiaqqatigullu inuit ingerlatseqatigiiffissuakkut imminnut atasut kiisalu ingerlatseqatigiiffissuakkut imminnut atasunik pappiaqqatigut inunnik akileraartussaataasumit pigineqartunit killormullu aningaasatigut agguagarsiat. Kaaviiartitatigut killigitamik naatsorsuineri akileraartussaataasup ingerlatseqatigiiffissuakkut imminnut atasumik pappiaqqatigut inuup akornanni kaaviiartitat ilanngunneqassanngillat.”

**10. § 36 b-mi, imm. 6-12** ivertinneqassapput:

” *Imm. 6.* Ingerlatseqatigiiffissuup nunani assigiinngitsuni ingerlatsisup ingerlatseqatigiiffik qullerpaatut aqutsisua, akileraartarnikkut § 1, imm. 1, nr 3-8, 10 aamma 12-14 naapertorlugu Kalaallit Nunaanni angerlarsimaffeqartoq, ingerlatseqatigiiffissuup ukioq isertitaqarfusooq nalunaarusiorfissaaq sioqqullugu katillugit minnerpaamik 5,6 mia kr.-nik kaaviiartitaqaruni akileraaruseriffimmut nunamit nunamut nalunaarusiamik suliaqassaaq. Nunamit nunamut nalunaarusiaq ukiup isertitaqarfusup nunamit nunamut nalunaarusiap nalunaarusiarineqarnerani ukiup ulluata kingulliup kingusinnerpaamik qaammatinik 12-it kingorna tunniunneqassaaq.

*Imm. 7.* Ingerlatseqatigiiffissuaq ingerlatseqatigiiffik qullerpaatut aqutsisuunngitsoq imm. 6 naapertorlugu nunamit nunamut nalunaarummik tunniussissaaq pissutsit makku atuuppata

1) § 1, imm. 1, nr. 3-8, 10 aamma 12-14 naapertorlugu ingerlatseqatigiiffissuaq akileraarusiisarnikkut Kalaallit Nunaanni angerlarsimaffeqarpat, aamma

2) tunngavissaatitaasut ataaseq arlallilluunniit naammassineqarpata:

a) Ingerlatseqatigiiffissuup ingerlatseqatigiiffik qullerpaatut aqutsisua nunami angerlarsimaffigisaani nunamit nunamut nalunaarusiamik tunniussissusaatitaanermik pisissaaffeqanngippat,

b) nunamit nunamut nalunaarusianik nammineq paarlaateqatigiinneq ajorput, tamanna Kalaallit Nunaanni pisussaallutik oqartussaasut oqartussaaffillu ingerlatseqatigiiffik qullerpaatut aqutsisoq suliffeqarfiup angerlarsimaffigisaani isumaqatigiissuteqartoqannginnerata nassatarisaanik, naak nunarsuarmioqatigiit akornanni akileraartarneq pillugu paasissutissanik paarlaasseqatigiittarnermik isumaqatigiissuteqartoqaraluartoq, imaluunniit

c) oqartussaaffik pillugu tulleriaarlugu kukkusoqartuarnera ingerlatseqatigiiffik qullerpaatut aqutsisoq akileraartarnikkut angerlarsimaffigisaani, akileraaruseriffillu ingerlatseqatigiiffissuup tassani nr. 1-imut ilaatinneqarneranik nalunaaruteqareernerani.

*Imm. 8.* Imm. 7, nr. 2-mi tunngavissat ataaseq arlallilluunniit naammassineqarpata, kalaallillu ingerlatseqatigiiffissui ataatsimit amerlaneruppata, takuuk imm. 7, nr. 1, ingerlatseqatigiiffissuit ingerlatseqatigiiffissuarmik ataatsimik imm. 6 naapertorlugu akileraaruseriffimmut nunamit nunamut nalunaarusiamik tunniussinissamik akisussaasussamik toqqaassapput. Toqqaaneq akileraaruseriffimmut nalunaarutigineqassaaq, takuuk imm. 10, uniffik siulleq.

*Imm. 9.* Ingerlatseqatigiiffissuaq nunamit nunamut nalunaarusiamik akileraaruseriffimmut tunniussinissamut pisussaannilaq, naak imm. 7, nr. 2-mi tunngavissaatitat ataaseq arlallilluunniit naammassineqarsimagaluarpata, ingerlatseqatigiiffissuaq nunani tamalaani ingerlatsisoq ukiumi isertitaqarfusumi ingerlatseqatigiiffiup aqutsisup sinniisaa aqqutigalugu akileraartarnermut

oqartussanut, ingerlatseqatigiiffimmut aqutsisumut sinniisoq akileraartarnikkut angerlarsimaffigisaanut nunamit nunamut nalunaarusiamik tunniussippat, tunngavissallu tulliuttut naammassineqarpata:

- 1) Oqartussaaffimmi ingerlatseqatigiiffimmut aqutsisumut sinniisup nunami akileraartarnikkut angerlarsimaffigisaani nunamit nunamut nalunaarusiamik tunniussinissaq inatsisitigut pisussaaffiuppat.
- 2) ) Oqartussaaffimmi ingerlatseqatigiiffimmut aqutsisumut sinniisup nunami akileraartarnikkut angerlarsimaffigisaani paasissutissanik Kalaallit Nunaannut paarlaasseqatigiittarnissamik nunat tamat akornanni isumaqatigiissuteqarpata, oqartussaasullu akornanni isumaqatigiissut naapertorlugu nunamit nunamut nalunaarusiat paarlaasseqatigiissutigineqartarpata.
- 3) Oqartussaaffik pillugu tulleriiarlugu kukkusoqartanngippat ingerlatseqatigiiffimmut aqutsisumut sinniisup akileraartarnikkut angerlarsimaffigisaani, imaluunniit akileraaruseriffik tulleriiarlugu kukkujuartoqartarneranik ingerlatseqatigiiffissuamut nalunaaruteqanngitsoorsimappat.
- 4) Oqartussaasoq ingerlatseqatigiiffimmut aqutsisumut sinniisup akileraartarnikkut angerlarsimaffigisaani ingerlatseqatigiiffissuarmut ingerlatseqatigiiffimmut aqutsisumut sinniisup akileraartarnikkut angerlarsimaffigisaani angerlarsimaffeqartumit nalunaarfigineqarnikuuvoq, tak. imm. 10, oqaaseqatigiit siulliat, ingerlatseqatigiiffissuup ingerlatseqatigiiffimmut aqutsisumut sinniisutut isigineqassasoq.
- 5) Nalunaarummik akileraaruseriffimmut tunniussisoqarsimatillugu, takuuk imm. 10, oqaaseqatigiit aappaat.

*Imm. 10.* Ingerlatseqatigiiffissuarmi nunani tamani ingerlatsisumi imm. 6 naapertorlugu ingerlatseqatigiiffik qullerpaatut aqutsisoq, imm. 7-iluunniit naapertorlugu ingerlatseqatigiiffimmut aqutsisumut sinniisoq kingusinnerpaamik ukiup isertitaqarfusup naanerani nunamit nunamut nalunaarusiap tunniunneqarfissaani, nalunaarusiamik tunniussinissamut pisussaaffeqarluni akileraaruseriffimmut nalunaaruteqassaaq. Ingerlatseqatigiiffissuup nunani tamalaani ingerlatseqatigiiffissuarmut qullerpaatut aqutsisuunngippat imaluunniit ingerlatseqatigiiffimmut aqutsisumut sinniisuunngippat, ingerlatseqatigiiffissuup kingusinnerpaamik ukiup isertitaqarfusup naanerani akileraaruseriffimmut, ingerlatseqatigiiffissuup akileraartarnikkut angerlarsimaffigisaani, nunamit nunamut nalunaarusiap nunami tunniunneqarfissaani, ingerlatseqatigiiffissuup sorliup nunamit nunamut nalunaarusiamik tunniussinissamut pisussaaffeqarneranik nalunaaruteqarnissamut pisussaaffeqarpoq.

*Imm. 11.* Imm. 6-10 oqaatsit tulliuttut ima paasineqassapput:

- 1) Ingerlatseqatigiiffissuup: suliffeqarfiit arlallit piginnittumikkut nakkutigineqarnermikkulluunniit imminnut atassuteqartut, taamaalilluni ataatsimut ingerlatseqatigiiffissuarmut atorineqartut naapertorlugit ukiumut suliaqassallutik, imaluunniit suliffeqarfik ataaseq arlallilluunniit aningaasanik nalilinnik niueqatigiiffinni nalunaarsorsimappata taamaattunik suliaqassallutik.
- 2) Ingerlatseqatigiiffissuup nunani tamalaani ingerlatsisoq: ingerlatseqatigiiffissuup akileraartarnikkut oqartussaaffeqarfinni ataatsimik amerlanerusuni ingerlatseqatigiiffissuarnik ingerlatsisoq.
- 3) Ingerlatseqatigiiffissuup:
  - a) Ingerlatseqatigiiffissuarmi nunani tamalaani ingerlatsisumi ingerlatseqatigiiffissuup sunaluunniit ataatsimoortumik ingerlatseqatigiiffissuarmi naatsorsuutini immikkoortutut ingerlatsisoq, imaluunniit ingerlatseqatigiiffissuup ataatsimoorussamik naatsorsuusiorsimassagaluarpat taamatut ingerlatsisoq, imaluunniit ingerlatseqatigiiffissuup ataaseq arlallilluunniit aningaasanik nalilinnik niueqatigiiffinni nalunaarsorsimappata.

b) Suliffeqarfik sunaluunniit ataatsimoorussamik ingerlatseqatigiiffissuup naatsorsuutaani suliffeqarfiup annertussusaa pingaaruteqannginneraluunniit pissutigalugu naatsorsuutitut ilanngunneqanngitsoq.

c) Suliffeqarfiup aalajangersimasumik ingerlatsivia sunaluunniit litra a-mut b-milluunniit ilaatinneqartoq, tamatumani ukiumut naatsorsuusiornermut imaluunniit akileraarusiinikkut naatsorsuusiornermut imaluunniit avataanit nakkutilliinermut siunertaqartunik tunngatillugu imaluunniit ingerlatseqatigiiffissuarmi namminermi aqutsinermik siunertaqartumik immikkut ingerlatsivimmut tunngasumut immikkut naatsorsuusiortoqarnerani.

4) Ingerlatseqatigiiffik qullerpaatut aqutsisoq: : ingerlatseqatigiiffissuaq, ingerlatseqatigiiffissuarmi nunani tamalaani ingerlatsisumi toqqammavinnik makkuninnga naammassinnittoq:

a) ingerlatseqatigiiffissuarmi nunani tamalaani ingerlatsisuni toqqaannartumik toqqaannangitsumilluunniit ingerlatseqatigiiffissuarnik ataatsimik arlallinnilluunniit naammaginartumik sunniuteqartoq, taamaalluni suliffeqarfik ataatsimoorussamik ingerlatseqatigiiffissuarmut naatsorsuusiornissamut malittarisassat atuuttut naapertorlugit akileraartarnikkut angerlarsimaffigisamini suliaqarnissamut pisussaaffeqarluni, imaluunniit aningaasanik niueqatigiiffinni nalunaarsorsimaguni taamaattunik suliaqartussaalluni.

b) Ingerlatseqatigiiffissuarmi nunani tamalaani ingerlatsisumi ingerlatseqatigiiffissuarmik ingerlatsivimmi allamik litra a-mi taaneqartumi toqqaannartumik toqqaannangitsumilluunniit naammaginartumik ingerlatseqatigiiffimmut sunniuteqartumik.

5) Kaaviiartitat: isertitat suliffeqarfiup nalinginnaasumik ingerlatsineranut atatillugu pilersut, tassani nioqqutissianik tunisineq, sullississutinik tunisineq, akissarsiat, erniat, iluanaarutisiat ajunngitsorsiallu ilanngullugit.

6) Ingerlatseqatigiiffik aqutsisumut sinniisoq: Ingerlatseqatigiiffissuaq imm. 8 naapertorlugu nunamit nunamut nalunaarusiamik nunami akileraartarnikkut angerlarsimaffigisamini tunniussisussatut toqqarneqartoq, imm. 7, nr. 2-mi toqqammavissaq ataaseq arlallilluunniit naammassineqarsimappata.

7) Pisussaasutut oqartussaasut akornanni isumaqatigiissut: inatsisit atuuffini naapertuuttuni akileraartarnikkut oqartussaasut pisussaasut akornanni nunat tamat akornanni isumaqatigiissut, nunamit nunamut nalunaarusianik nunat pineqartut akornanni tamatigit paarlaateqatigiittarnissamik imaqqartoq.

8) Nunat tamat akornanni akileraartarnikkut paasissutissanik paarlaateqatigiittarnissaq pillugu isumaqatigiissut: marloqiusamik akileraartannginnissamik isumaqatigiissut, nunat tamalaat akornanni isumaqatigiissut imaluunniit nunani tamalaani isumaqatigiissut imaluunniit allaffissornikkut akileraartarnermut suliani ikiuinissaq pillugu isumaqatigiissut sunaluunniit naapertorlugu Kalaallit Nunaata oqartussaaffimmi ataatsimi arlallinnilluunniit akileraartarnikkut paasissutissanik paarlaateqatigiittarnermik isumaqatigiissutaa, tassani paasissutissanik paarlaateqatigiinnerit tamaasa ilanngullugit.

9) Oqartussaaffinni tulleriiarlugit kukkujuarnerit: Kalaallit Nunaanni pisussaasutit oqartussaasunik oqartussaaffimilu pineqartumi isumaqatigiissuteqartoqarpat, kisiannili paasissutissanik paarlaateqatigiittarneq pissutsinik oqartussaaffit akornanni isumaqatigiissummi aalajangersarneqartunit allamik toqqammaveqartumik oqartussaaffimmit atorunaarsitsisoqarsimappat, imaluunniit arlaleriarluni nunamit nunamut nalunaarusianik Kalaallit Nunaannik paarlaassineq pinngitsoorsimappat, nunani tamalaani ingerlatseqatigiiffissuaq Kalaallit Nunaanni ingerlatseqatigiiffissuarnik ingerlatsiffigisaani.

*Imm. 12. Nunamit nunamut nalunaarusiat pillugit Naalakkersuisut malittarisassanik erseqqinnerusunik malittarisassiorsinnaapput."*

**11. § 47 b, imm. 7-imi, oqaaseqatigiit aappaat atorunnaarsinneqarput.**

## **§ 2**

Inatsisartut inatsisaat 1. januar 2019-imi atuutilissaaq, taamaattorli takuuk imm. 3.

*Imm. 2.* Inatsisartut inatsisaat ukioq isertitaqarfusoq 2019 aallarnerfigalugu ilanngullugulu atuutilissaaq.

*Imm. 3.* Inatsisartut inatsisaanni § 1, nr. 5 ulloq 1. januar 2018-imi atuutilissaaq aammalu ulloq 1. januar 2020-mi atorunnaassalluni.

*Namminersorlutik Oqartussat, ulloq 28. november 2018*

Kim Kielsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut